

GIUSEPPE DE VERGOTTINI, VALERIA PIERGIGLI (Eds)  
*Topographical Names and Protection of Linguistic Minorities*  
("Schriften zum internationalen und zum öffentlichen Recht", 99)  
Peter Lang, Frankfurt am Main, 2011

La toponomastiche e je une materie che e interesse diviersis dissiplinis paï siei aspiets lenghistics, storics, gjeografics, culturâi, socio-antropolojics e v.i., ma però e à ancje une dimension tal dirit. I topónims di un teritori a àn un grant valôr simbolic e identitari pes comunitàs locâls, so redut dulà che a vivin minorancis lenghistichis. Propit par chel chest al è il setôr plui delicât de dimension juridiche de toponomastiche. Di fat si àn vudis, di une bande, azions di stamp nazionalistic di proibizion o sostituzion dai topónims in lenghe locâl, par dîneâ il leam etno-lenghistic cul teritori, di chê altre a son invezit rispietâts i dirits des minorancis cun intervents di valorizazion o ancje ufficializazion dai nons in lenghe minoritarie. Chest libri di 466 pagjinis al è probabilmentri il prin tentatîf di studi de situazion juridiche di tutele des minorancis lenghistichis in materie di toponomastiche cul confront di diviers païs europeans. Il volum al è rincurât di doi studiôs di dirit public comparât, Giuseppe de Vergottini de universitat di Bologne e Valeria Piergigli de universitat di Siene, e al met adun 17 contribûts scrits par inglês di studiôs taliens e forescj.

Il libri al è dividût in dôs parts: la prime e trate di plui i aspiets storics e linguistics (*Linguistic and historical framework: general issues*), la seconde part invezit e viôt dai aspiets juridics de tutele des minorancis tai nons di lûc e e presente diviers cás e esperiencis in Italie e in Europe (*Toponomastics as means of protection of linguistic minorities: legal issues in the comparative perspective*).

Il prin contribût (*Toponomastics and its partitions*) al è scrit di une autoritat tai studis onomastics, Carlo Alberto Mastrelli, e al è une introduzion ae toponomastiche, sot dal aspiet linguistic. Ma plui di dut a son tratâts i aspiets e lis problematicis plui leadis aes ativitâts di tutele: toponomastiche urbane e odonimie, ufficialitat e ufficializazion de toponomastiche in lenghe minoritarie, bilenghisim e polimorfie toponimiche.

Tal secont contribût Daniela Giaimo e cjacare dal Alto Adige/Südti-

rol (*The history of place names in Alto Adige/Südtirol: origin, development and sources of Italian toponomastics in the Burgraviato area of Merano and in Val Venosta in relation to German diction*) e di cemût che la comission presiedude di Ettore Tolomei e à lavorât par talianizâ i toponyms todescs. Il *Prontuario dei nomi locali dell'Alto Adige* publicât tal 1916, e in gnovis edizions tal 1923 e tal 1935, al è ancjemò in vore.

La prime part dal volum si siere cul contribût di Davide Rossi (*Along the streets of Trieste: Roads, culture and law between the Austro-Hungarian Empire and the Italian Republic*) che al conte i cambiaments te titolazion des stradis di Triest daûr des sôs vicendis storichis-politichis. Par esempli la *Contrada di Vienna*, clamade *Via del Corso* fin tal 1918, po *Corso Vittorio Emanuele III*, *Corso Ettore Muti* (no uficiâl), *Corso Tito* e *Corso Italia* dal 1955.

La seconde part dal volum si vierç cuntun contribût di Peter Hilpold su la toponomastiche tal setôr dal dirit internazionâl (*Topographic names and international law*). La ONU tal 1959 e à metût sù un grop di esperts (UNGEGN = *United Nations Group of Experts on Geographical Names*) che e veve soredut chê di judâ i procès di standardizazion dai nons gjeografics par semplificâ e miorâ la comunicazion internazionâl. Po dopo e à tacât a tratâ ancje de toponomastiche des minorancis, ma soredut dai popui indigjens, soredut cu la Risoluzion n. 4 dal 1967. Ancje la Convenzion-cuadri pe protezion des minorancis nazionâls (FCNM) dal Consei European, fate buine dal 1998, e trate chest aspiet tal so articul 11 (c. 3). Ma cheste e je une disposizion une vore gjeneriche, formulade cussì pe oposizion di cualchi Stât membri.

Dopo vê fate une panoramiche su la tutele in Italie des minorancis in materie di toponomastiche, il contribût di Valeria Piergigli al torne su la situazion in Trentino-Alto Adige/Südtirol (*The legal regulation of toponomastics in Italian law and the specific situation in Trentino-Alto Adige/Südtirol*). Il statût di cheste region al da la potestât legislativé su la toponomastiche aes dôs provinciis autonomis di Trent e di Bolzan. Trent e à za proviodût e regolamentât cheste materie sedi pes comunitàs ladinis, che pai mochenis e i cimbris. Bolzan invezit nol è ancjemò rivât a fâ buine une regolamentazion, viodûts i contrascj politics tra i partîts todescs e talians.

Il contribût di Gugliemo Cevolin nus puarte in Friûl Vignesie Julie

(*Protection of linguistic minorities and toponomastics in the Italian region Friuli-Venezia Giulia*), fasint un confront tra lis normativis in materie di toponomastiche des trê minorancis (furlane, todescje, slovène) tuteladis de leç nazional 482/99 e des leçs regionâls. L'autôr al cjate cualchi difference e disomogjenitât tra i trê sistemis e di plui al trate ancje dal rosean, che al vûl rivendicâ une sô autonomie rispiet dal sloven ancje sul aspiet dai nons di lûc.

Il contribût di Antonella Benazzo (*The languages of France and toponomastics*) al viôt de situazion de toponomastiche in France, dulà che si fevelin – di plui dai dialets locâi – ancje altris lenghis: catalan, ocitan, franco-provençal, cors, breton, basc, flaminç, todesc alsazian e i idiomis autoctons dai teritoris di là dal mår. Se i nons des circoscrizioni administrativas spietin al guvier, di chei altris toponims si ocupin l'*Institut Géographique National* (IGN) e la *Commission nationale de toponymie* (CNT). Però a nível local a son diviers istitûts di ricercje, soredut tes areis di lenghe minoritarie, che a àn chê di recuperâ e valorizâ (ancje te segnaletiche) la toponomastiche in lenghe locâl.

Il contribût di Susanna Mancini (*Belgium: only by name? Vanishing federalism and invisible minorities*) al analize la situazion dal Belgjo, paîs di fat dividût in doi (aree valone e aree flaminghe di fat monolengâls), cuntun regjim di territorialitat lenghistiche rigjide che al scjafoie i dirits des comunitàs valonis o flaminghis che a vivin dentri te aree di maiorange di chê altre etnie.

Un altri intervent di Peter Hilpold al conte de situazion in Austria (*Topographic naming in Austria*), dulà che a son cetantis cuistions su la dissipline juridiche de toponomastiche in lenghe minoritarie (slovène, cravuate, ongjarese). In particolâr te Carinzia a son ancjemò fuarts dissidis politics su la segnaletiche bilengâl todescje-slovene.

Il contribût di Lidija R. Basta Fleiner e Thomas Fleiner (*Topographical names and minority rights: the case of Switzerland*) al conte de situazion juridiche de toponomastiche in Svuizare, là che Dewi Llŷr Jones al trate invezit dal Ream Unît e de situazion des sôs minorancis sui nons di lûc e in particolâr dal Gales (*Place names and minority language protection in the United Kingdom*).

La Spagne e ven analizade di Giovanni Poggeschi (*Place names in Spain: the prominence of the linguistic pluralism of the Estado autonómi-*

co) che al fâs un confront tra lis normativis des comunitàs autonomis cun lenghe minoritarie uficiâl o tutelade: Païs Basc, Navare, Catalogne, Isulis Balearis, Comunità Valenziane, Galizie, Aragone, Asturiis. In buine part di chestis regions i toponims a son dome te lenghe locâl e i segnâi bilengâi a comparissin nome pes localitâts fûr de aree de tutele lenghistiche. Di plui in Catalogne e je previodude ancje la difese juridiche e processuâl dai toponims catalans aplicâts al setôr de industrie.

Il contribût di Francesco Palermo al analize la situazion in Cravuazie (*Minority protection and regulation of place names in Croatia*) che e à viodût un grant cambiament de epuche di Tuđman (1991-1999), caraterizade di une politiche nazionalistiche cun limitazion dai dirits des minorancis, al dopo-Tuđman plui favorevul. Cumò a son diviersis leçs di tutele, ma a son soredut i statûts comunâi che a tratin la toponomastiche in lenghe minoritarie, des voltis ben prudelade (p. es. a Rovigno/Rovinj).

Carlo Casonato al viôt invezit de Slovenia (*Toponomastics as an instrument of protection and valorisation of the Italian community in Slovenia*), soredut de tutele de minorance taliane in materie di nons di lûc. Lis normis primariis e statutariis a dan une buine protezion de toponomastiche taliane, e i statûts comunâi (soredut a Cjaudistre, Isule e Piran) a stabilissin un bilenghisim efetîf.

Il contribût di Boris Krivokapić al è dedicât ae situazion in Serbie (*Toponomastics and protection of ethnic (national) minorities: legislation and practice of the Republic of Serbia*), dulà che a vivin diviersis minorancis (ongjarêts, bosgnacs, rom, cravuats, albanêts, slovacs, rumens, e v.i.). La Costituzion dal 2006 e permet di doprâ toponimie e odonimie in lenghe minoritarie dulà che la minorance e sedi consistent. In particolâr l'autôr al conte de provincie autonome de Voivodine, a fuart multietniche. La aplicazion pratiche des normativis no je simpri compagne: a son esemplis in positif, ma ancje fenomins di oposizion.

Sergiu Constantin al conte invezit de Romanie (*Linguistic rights and minority toponymy in Romania*) e dal cuadri legislatif di tutele des minorancis nazionâls (ongjarêts, ucrains, todescs, rus, turcs, serps, slovacs, bulgars, e v.i.). La Romanie e à firmât e ratificât la Cjarte europeane des lenghis regionâls o minoritariis, ma la toponomastiche no ven nomenade esplicitamentri tes leçs di tutele. Si à une situazion une vore differenziade sul teritori, cun esemplis in positif, ma ancje in negatif.

L'ultin contribût al è scrit di Orsolya Farkas e nus conte de Ongjarie (*Geographical indications as means of protection of minorities: the situation in Hungary*), che no à une situazion tant facile pes minorancis, ancje in cont de toponomastiche in lenghe minoritarie, soredut dopo de aprovazion de gnove Costituzion tal 2011.

*Franco Finco*

CIRF - Centri Interdipartimentâl di ricerche  
su la lenghe e la culture dal Friûl  
Universitat dal Friûl, Udin, Italie  
[franco.finco@uniud.it](mailto:franco.finco@uniud.it)